

求恕齋
叢書

雪橋詩話三集

十二

雪橋詩話三集卷第十二

遼陽楊鍾義撰集

吳興劉承幹參校

文宗御製詩云侍臣何必勸加餐夢寐爲懷民未安彌
望蒼生登衽席何來蝨賊亂衣冠萬年欲奠神禹鼎一
日須新湯 盤嗟爾羣臣皆結舌空羣故事待金鑾大
江南北亂離中豈是妖氛氣力充守土居然皆走鹿斯
民能不賦哀鴻九重自揣勤思慮三載何曾奏 功凌
閣至今猶漢代丹青何以繪諸公時值四方多事宵旰
勤勞幾餘灑翰因事述懷九重憂勤有非廷臣所能窺

仰者顧復初詩鼎湖一紀御璠宸痛值遭家不造辰廟
算早能平寇盜天心況復最慈仁成功應告 先皇廟
報國還須少主臣今日有嘉占折首共殲行見萬方賓
金陵克復時作也本朝爲治主於惇大寬厚以涵育天
下乾隆閒盡棄租稅以予民至於六舉嘉慶川楚之役
仁宗聖訓有云自古惟聞用兵于敵國不聞用兵于
吾民自相攻擊屠戮生靈朕日夜哀憐幾至寢食俱廢
恩旨旣頒人人感動彼時賊中遇見膽黃竟有沈吟歎
息言可惜我已成騎虎之勢者實爲底定之本咸豐初
廷臣有請加賦者 上不許李愛伯詩感念今 皇建

極初綸言迭下免征輸民頑尙忍連羣盜廷議還聞斥
重租軍興十載兵不足而用勇漕不繼而改海運餉不
足而製大錢裁河員之浮冗減京餉之成數而水旱偏
災蠲緩錢糧未嘗一日不恤民隱後來戡亂諸臣皆出
特簡憑几末命以東南禾平百姓蕩析離居慘罹鋒鏑
爲念 穆宗秉承遺謨壬戌元日下卹民求言詔凡數
千言以逆匪肆擾連歲用兵推原其始孰非朝廷赤子
良由迫於飢寒鋌而走險每於披覽章奏見其殺賊多
名者爲之惻然矜憫前以軍餉浩繁度支不足不得已
議畝捐釐捐之舉地方有司不知善爲經理令各督撫

酌量撤留民閒疾苦有言事之職者隨時上達中興偉烈實基此矣光緒季年事變紛乘 德宗以天地之量爲量以百姓之心爲心變法圖強原期朝野同心君臣交勉而奉行不善禮教蕩然至假民視民聽之言成紫色鼃聲之局其怨恫寧有極哉

朱伯韓懷鄭小谷詩鄭子在谷口散髮作隱淪西曹早挂冠五十而多聞小谷象州人字獻甫其名避 文宗舊諱以字行爲文章貫串古今直抒所見不喜近之爲文者其言曰道無所謂統也道有統其始於明人所輯宋五子書乎文無所謂派也文有派其始於明人所選

唐宋八家乎自道之統立文之派別遂若先秦以來之
賢人君子東漢以來之鴻篇鉅製皆可置之不論夫一
代之世運與一代之人才合而成一代之文體文體不
同而精采皆同若具一孔之見勒一途之歸則陳陳相
因而已然則宋五子不足宗八家文不足法乎曰否知
賢人不止五子則何病乎宗五子知古文不止八家則
何病乎法八家余惡夫徒知有五子八家者耳而況問
以五子書八家文而亦未全寓目也陳蘭甫稱其特起
於廣西學行皆高取所著法論儲材議士策學宮議權
論及治盜說練民練勇議載之傳中比於王符仲長統

汪梅村助教庚子舉人從績谿胡培翬荆谿任泰游與楊大培同精三禮號曰汪楊嘗謂學者必先有得力之一書而後能推類以旣其餘於水經注致力尤深避粵寇居績谿五年座主胡文忠迎入鄂時屬有裁兵議上書推得失文忠深納之江寧旣復歸葺金沙井老屋杜門卻埽頤情典籍曾文正以謂芳絜欲師陶靖節湛冥略近蜀君平光緒十五年卒年八十有六其弔陸平原詩序云昔在聖哲隨時卷舒或屠釣以秉麾或鉏耜而俘玉沈機所運則苞櫟不遺開識之周雖彭濮必炤卽其灰留汲冢書授周庭迺銘版之微言非總干之至略

文武異揆斷可知矣平原雲閒擅譽洛下影纓先識媿
於季鷹辟權嫌於首鼠受任羈旅之中感激若盧之下
孟玖之與牽秀朝歌至於富平老成寒心羣貴側目而
乃耽於榮利忘其幹用犬書鶴唳覺由躁進跡其端木
非不幸也夫才能匡世則著鞭爲義位在勿用則見田
亦非豈有再世部曲不拒於龍驤少年新進能振於鹿
苑咎徵黑幘挾能開歟嗟乎元圃之玉非能御於瑯戈
幽壑之桂乃足貞於繡嶺以士衡之才蚤從顧榮戴若
思之言山鹿野麋素位退守消搖峰泖肆情文翰忘懷
隱顯豈不偉歟而乃相攜闇朝縈心榮利卒使超枚馬

躡王劉之妍贍與賁軍覆事之大夫同一駢首就戮而
世乃以爲西陵之凶端也悲夫失路才人讀之當爲顏
汗至夏子儀陳琳墓詩未必文章闢大義何須去就責
才人則文士之怨詞耳

汪梅叟詩文筆記外刻有悔翁詩餘二卷年二十餘時
集漢書仿班體爲燕然山銘程春海侍郎謂爲美人細
意熨帖平裁縫滅盡鍼綫跡欲以冠課卷再三辭之方
已梅叟時未應書院試也侍郎因以高麗牋篆爲沈博
絕麗之文作實事求是之學楹帖和贈有惜秋華一闋
志其事云出眾梳妝被神仙歎賞當今無輩搓玉團香

誰識麻姑狡獪惠然召入瑤池紅襦繫遺珠贈佩不知
我淮南疏散野人風味如夢復如醉自長明賦後朱顏
憔悴鸞鏡懸窗羞畫舊時眉翠眾中彈斷么弦俱掩耳
瑟膠琴碎流涕除惠施孰爲垂慰感知懷舊悵纏綿
其滿江紅一闕則爲陳子鶴孚恩死塞外作也詞云江
上芙蓉誰妝點傾城絕色一霎時嚴霜朔吹芳華都歇
作奏才離黃祖席荷戈遠譴烏孫國知從前門下與樞
廷心難測流沙外天山北去共驩親墨特免歐刀槃水
恩波寬闊乞蓋難邀天尺五招魂不附詩三百若中郎
只作泰山游全名節亦有稼軒于湖遺響

湘帆戶部壽昌世駐防江寧博研諸經尤善言聲音訓詁之學文入南朝人室詩學蘇長公未弱冠舉道光乙未鄉試一上春官不第無何改駐防人鄉會試例用國書非所習驟學之不能盡其奧時吳縣馮景亭主惜陰書院奇其才赴官京師謀之卓文端爲納粟得筆帖式援駐防京官子弟例仍得如京旗人與漢試也至是始以道光三十年成進士改庶吉士時論與武陵楊季涵德清俞蔭甫丹徒丁濂甫並稱咸豐壬子散館改主事賊趨江寧迎母及妻與子未至而江寧陷家羈賊中不得出遂病卒所著書惟夏小正疏證已具橐金亞匏詩

他日誰能間遺橐斯人天竟冑虛生蓋深惜之同時若
蔡子涵楊柳門周還之馬鶴船姚西農皆惜陰一時之
雋也

治菴太守文良襄勤公勒保孫孔修相國昆弟行也藏
書最富多精本官蜀最久沈意文贈詩云朔風獵獵動
旌竿山勢凌雲作畫看城上角聲樓上月與君同耐五
更寒善政頻年賣劍風無端袴裙竟從戎君家故事麒麟
閣父老猶能說相公時咸豐己未方守嘉定城也蔭
方尙書阜保與家春宇先生宜振乙巳同年性嗜收藏
書畫多精品嘗親至裝潢家指授方法其故物亦久散

落矣

咸豐三年赫舍里雲笏先生由比部守襄陽勦匪全城
量移武昌與陶問雲中丞同時殉節江夏陳維周有多
雲笏太守戰馬歌云太守之馬連錢驄長鬃莽蕩如騎
龍馬高八尺頭角嶄雄姿逸態摩青空四蹄踏鐵躡紫
電雙眼夾鏡瑩方瞳射生健兒不敢跨一心報主成殊
功積雲壓陣陣鼓急天骨開張屹山立巨礮一聲眾馬
暗烈火光中奮身入人膝馬腹相迸合左射右射短兵
接馬首辟易萬賊泣頭顱亂落輕如葉追奔餘怒騰秋
潮一躍三丈飛空壕戰罷歸去塵不動朔風捲地天爲

高公昔麾守來襄陽此馬相隨百戰場自從量移武昌
郡又值狂寇紛梟張庫無儲銀廩無黍大官遠遁擁千
櫓嚙指呼天絕外援誰與守者一巡撫此時此馬慘無
色長鳴頓轡氣填臆可憐赤汗桃花紅熱血滿腔酬不
得殺氣入城女牆黑太守上馬呼殺賊謂馬汝奮我死
格生共功名死報國馬蹏蹂屍不暇擇只見刀光一片
白斫賊愈多勢愈劇人眾拚用孤軍敵須臾亂箭中馬
死太守裏創仆復起橫矛解印授團兵忠魂遂葬井泉
水吁嗟乎騏驎食粟酬主恩生平所事得其人始信飛
黃有眞種但遇伯樂甘殺身鄂州城中巷戰處蘭筋拳

毛紛血污居民知是太守馬髮上翦痕有明據我欲千金買骨勸忠良留取丹心照萬古

陳維周名之楨辛亥登賢書謁選人得知縣以養親不赴改授黃岡教諭時吾外舅李獻之太守令黃岡藏有趙管雙硯硯端產一爲文敏公物背三眼上鐫五雲多處是三台七字下鐫松雪珍藏四字旁署云余將北行獨孤長老遺予佳石質潤而妍如新泉欲流不能去手星眼適符合瑞因試貂毫試之一爲仲姬物背書金谷詩序跋云右石季倫金谷詩序實石軍蘭亭所自出晴窗無事偶用褚法書此實不敢與此老抗衡也未署管

道昇識席上出觀維周爲賦長歌一首載集中維周幼
喪父家貧食苦善體母心夜篝鐙紡績誦讀聲相閒其
落第南歸題涿州店壁有遙維白髮憑闌望不念科名
念子還之句胡文忠將以孝行聞于朝再三懇辭乃止
當文忠訪舉時士大夫帕首衣短後從戎不數年而任
方面者不可一二數其不肯引咎上道亦足尙也

甘泉李肇增冰署序淮海秋笳集云秦川公子茹歎流
離杜陵野翁含傷羈泊蓋咸豐中兵事方棘時所刻也
皆南人惟姚仲海爲蓋平人譚復堂謂其詞思力刻至
才性均厚是一作家丙辰三月重過蕪城鶯囀序云荒

城綠蕪又滿接昏雅成陣嗟雉堞寂寞鐙火不捲黯黯
殘暝有是處天涯寒食無語魂先凝莫重提佳麗揚州
六朝金粉紫陌樓臺平疇薺麥且向斜陽認只前度繁
華不管冶春灰燼正搖空聲聲怨角早吹入愁人愁鬢
更斷腸潮打滄江苔枯習井舊歡落拓往事悲涼髮已
星星賸漫回憶隔年消息罅窗遙月窺人依然清鏡飄
零何世別懷誰倩笙歌十里珠簾夜記高樓聽雨碧闌
凭芳陰倦撲畫船來去晴波盪碎一川風影而今心跡
笛裏關山夢中塵梗緣底事又重來極目露汀煙町流
鶯忍向黃昏聽終古垂楊猶自青青甚竹西路隔輕寒